

KONTROL MOZIOA

Emakumeen Etxearen kokapenari buruz

EH BILDU udal-taldeko zinegotzi Sandra Barrenetxea Diezek, Udalbatzaren Organo Araudiaren 98. artikulua babesean, Donostiako Emakumeen Etxearen kokapenari buruzko KONTROL MOZIO hau aurkezten du, Udalbatzan azter dadin.

JUSTIFIKAZIOA

Berriz ere, behin eta berriz errepikatzen den gai bat dakargu osoko bilkurara, gobernu-taldeak konponbiderik ematen ez diola eta. Gogoan dugunez, 2023an, Emakumeen Etxearen koordinakundeak berariazko eskaera bat egin ondoren, Udalbatzak konpromisoa hartu zuen Emakumeen Etxea beste espazio batera lekualdatzeko, bertan egiten diren jarduerak modu duinean garatzeko eta instalazioen kalitatea bermatzeko, bai eta irisgarritasun unibertsala eta espazioaren beraren erreferentzialtasuna bermatzeko ere.

Ezin dugu ahaztu Emakumeen Etxea ekipamendu publikoa dela, eta Donostiako emakume guztien eskura egon behar duela. Eta ekipamendu publikoak gobernu jakin batek herritarrei ematen dien arretaren isla direla, haien eskubideak zer-nolako kalitatearekin gauzatzen dituen erakusten dutela. Errealitate bihurtutako konpromisoak dira.

Jakina da Emakumeen Etxearen kokapen berrirako kontuan hartu diren aukeren artean, batek ere ez dituela betetzen bertan egiten diren jarduerak modu duinean gauzatzeko izan behar dituen ezaugarriak. Eskaintza horietako azkena Loiolako Erriberetan oraindik eraiki gabe dagoen lokal bat izan da, baina horrek ere ez ditu betetzen Udaleko Berritasun Bulegoak berak espazioa egokitzat jotzeko beharrezkotzat jotzen dituen baldintzak. Paradoxikoa da Emakumeen Etxearen beharrak eta baldintzak ezartzen dituen txostenaren ardura duen zinegotzia izatea, halaber, txosten horretan bertan jasotako baldintzak betetzen ez dituzten etengabeko proposamenak egiten dituenak. Paradoxikoa da, orobat, azken asteetan zinegotzi hori bera Emakumeen Etxearen Elkartearen bizkar jartzen saiatu izana hark ekipamendu horren egoera prekarioaren gainean duen erantzukizuna.

Nolanahi ere, arazoak konponbiderik gabe jarraitzen du, eta bertan ematen diren zerbitzuak baldintza osasungaitzetan eta espaziorik eta irisgarritasunik gabe ematen dira oraindik ere. Horregatik, hautemandako premiekin bat datozen benetako aukerak aztertu behar ditu gobernu honek, eta Bretxako espazioa da une honetan azterketa hori egiteko aukerarik argiena.

Bretxa eraikin enblematikoa da, hiriaren erdigunean kokatua dago, ikusgarritasun eztabidaezina du, eta behar besteko zabalera, eta gobernu-talde honek harentzat pentsatua duen erabilerak ez ditu inola ere gogobetetzen Parte Zaharreko bizilagunak, ezta donostiarrek une hauetan dituzten beharrak ere. Emakumeen Etxea hor kokatuta ekipamendu horren prekaritate-egoera eta auzoak berak

harremanetarako eta topaketarako espazio sozialak eraikitzeko duen beharra konponduko litzateke, eta gizarte- eta komunitate-ehuna biziberritzeko lekuak berreskuratuko lirateke. Parte Zaharra ofizialki ostalaritzarako eremu "asetzat" jotzen da, eta ez du espazio gastronomiko gehiago behar.

Horiek horrela direla, hauxe da EH Bildu udal taldeak dakarren **KONTROL MOZIOA**:

- 1.- Donostiako Udalbatzak gobernu-taldeari eskatzen dio azter dezala Donostiako Emakumeen Etxea Bretxako eraikinean kokatzeko bideragarritasun teknikoa eta ekonomikoa.
- 2.- Donostiako Udalbatzak gobernu-taldeari eskatzen dio jaso dezala Emakumeen Etxearen koordinakundeak eta Parte Zaharreko auzo-elkarteek Emakumeen Etxea Bretxako eraikinean kokatzeko aukerari buruz duten iritzia.

Donostian, 2026ko martxoaren 19an

Sandra Barrenetxea Díez
EH BILDU udal taldeko zinegotzia